

Govor guvernera Centralne banke Bosne i Hercegovine dr. Senada Softića na predstavljanju Izvještaja Međunarodnog monetarnog fonda pod nazivom “Regionalne ekonomske perspektive za Evropu”

Sarajevo, 13. 11. 2017.

Poštovani gosti,
Poštovani g. Decressin,
Panelisti, kolege,
Dame i gospodo,

Zadovoljstvo mi je da vam poželim dobrodošlicu u prostorijama Centralne banke Bosne i Hercegovine danas radi prezentacije Prve regionalne ekonomske perspektive MMF-a za Evropu. Zahvaljujem se MMF-u što je izabrao Bosnu i Hercegovinu za ovaj događaj.

Sastajemo se danas u dobrom trenutku za Evropu i Bosnu i Hercegovinu. Ekonomski rast postaje sve jači. U eurozoni, očekuje se da će rast ostati oko 2 posto u 2018. Inflacija, značajno pitanje za nas centralne bankare, se očekuje da će ostati stabilna u 2018.

U Bosni i Hercegovini, rast je bio 3.1 posto u 2016. Očekujemo da će se oporavak nastaviti.

Centralna banka Bosne i Hercegovine nastavlja da održava monetarnu stabilnost striktnom implementacijom aranžmana currency boarda, kako je definisano zakonom.

Inflacija ostaje čvrsto vezana za trendove cijena u eurozoni. Očekujemo da se cijene neće povećati za više od 1,5 posto u 2018.

Veoma je bitno za nas u Bosni i Hercegovini da se rast u Evropskoj uniji nastavi u srednjoročnom periodu.

EU je naš najvažniji trgovinski partner i strani investitor. Velika bosanska dijaspora šalje doznake koje iznose blizu 12 posto BDP-a godišnje.

To su veoma jake ekonomske veze koje treba posmatrati zajedno s našom dijasporom kao važan resurs za ekonomski razvoj zemlje.

Međutim, oni koji definišu politike u Evropi, i takođe ovdje u Bosni i Hercegovini, treba da iskoriste oporavak radi implementacije ambicioznih ekonomskih mjera i strukturalnih reformi.

Za Bosnu i Hercegovinu, treba da se fokusiramo na tri velike oblasti:

1. Prvo, moramo popraviti strukturu budžeta na svim nivoima vlasti. Generalne vlade Bosne i Hercegovine su na putu da dostignu kombinovani ukupni fiskalni suficit drugu godinu uzastopno. Međutim, mora doći do preusmjeravanja potrošnje prema infrastrukturi, što će pomoći u sustizanju evropskih standarda i **poboljšanju povezanosti i konkurentnosti naše privrede.**

2. Drugo, moramo nastaviti jačati jedinstveni finansijski sistem Bosne i Hercegovine. Bankarski sistem u Bosni i Hercegovini je jak i stabilan. Ima dovoljno likvidnosti i dovoljnog kapitala. Napredak je napravljen od 2015. godine, uspostavljanjem nove bankarske regulative, koja bosanskohercegovački bankarski sistem približava evropskim standardima.

Ipak, ostalo je još puno posla da se uradi za rješavanje problema iz prošle finansijske krize. S više od 11 odsto od ukupnih kredita, nekvalitetni krediti nastavljaju da opterećuju bilanse banaka. S tim u vezi, usvajanje nove regulative o stečaju na entitetskom nivou i razjašnjenje poreskog tretmana prodaje nekvalitetnih kredita će pomoći u rješavanju ovog problema u narednom periodu.

3. Treće, trebalo bi da udvostručimo napore za poboljšanje naših institucija i rješavanje nedostataka u upravljanju. Strane direktne investicije su zastale na oko dva procenta BDP-a godišnje. **Ovo je suviše malo** da bi se podržala veća stopa rasta koja će smanjiti nezaposlenost i iseljavanje.

Poboljšanja u kvalitetu regulative, poštena i transparentna "pravila igre" i transparentne i odgovorne institucije će pomoći da se privuče više stranih investicija.

Stoga moramo poslati jasnu poruku o pozitivnim rezultatima naših reformi, povećati reputaciju Bosne i Hercegovine, poboljšati konkurentnost kako bismo povećali investicije i rast, a

istovremeno ojačali jedinstveni ekonomski prostor kako bi konačno popločali put ka našoj evropskoj budućnosti.

Hvala vam za vaše vrijeme i nadam se da ćete uživati u interesantnom događaju koji slijedi.